

四庫全書

子部

欽定四庫全書

子部
闡見錄卷十四至
七

詳校官監察御史臣邱文愷

侍讀臣孫球覆勘

總校官進士臣繆琪

校對官中書臣王家寶

謄錄舉人臣胡念祖

欽定四庫全書

聞見錄卷十四

宋 邵伯溫 撰

元豐末神宗山陵韓康公尹洛凡上供之物皆預辦雖中貴人不敢妄有所求蓋公之子宗師從賢士大夫游有所聞必白公施行之又朱光庭拔杜純孝錫皆府官薦為山陵司屬二人忠信有餘多所論列役成而民被其賜公以功拜使相判大名既去而人益思之先是神宗靈駕次永安公迎於郊朱太妃護駕於後公亦迎之

太妃還禁中偶為宣仁太后言宣仁怒曰韓某先朝老臣汝安得當望塵之禮太妃泣謝公之名重如此也

韓持國大資知潁昌府時彥以狀元及第為簽判初見持國通謁者稱狀元持國怒曰狀元無官耶自此呼時彥簽判云彥終身銜之馬涓巨濟亦為狀元及第為秦州簽判初呼狀元呂晉伯為帥謂之曰狀元云者及第未除官也既為判官不可曰狀元也巨濟愧謝晉伯又謂巨濟曰科舉之學既無用修身為己之學其勉之時

謝良佑顯道作州學教授顯道為伊川程氏之學晉伯每屈車騎同巨濟過之則顯道為講論語晉伯正襟肅容聽之曰聖人言行在焉吾不敢不肅又數以公事案牘委巨濟詳覆且曰修身為己之學不可後為政治民其可不知巨濟自以為得師後立朝為臺官有聲每曰呂公教載之恩也賢於時彥遠矣

元祐初哲宗幼冲起文潞公以平章軍國重事召程頤正叔為宗政殿說書正叔以師道自居每侍上講色甚

莊繼以諷諫上畏之潞公對上恭甚進士唱名侍立終日上屢曰太師少休公頓首謝立不去時公年九十矣或謂正叔曰君之倨視潞公恭議者為未盡正叔曰潞公三朝大臣事幼主不得不恭吾以布衣為上師傅其敢不自重吾與潞公所以不同也識者服其言

元祐三年范忠宣公為尚書右僕射有吳處厚者以蔡確題安州車蓋亭詩來上以謂謗訕宣仁太后得之怒曰蔡確以吾比武后當重謫呂汲公為左丞不敢言忠

宣乞薄確之罪不從初議貶確新州忠宣謂汲公曰此
路荆棘已七八十年吾輩開之恐自不免汲公又不敢
言忠宣因乞罷政以觀文殿大學士知潁昌劉摯罷哲
宗與宣仁太后復用忠宣為右相宣仁太后寢疾宰輔
入問后留忠宣曰卿父仲淹可謂忠臣在章獻太后朝
勸后盡母道在仁宗朝勸帝盡子道卿當似之嗚呼宣
仁后之所以望忠宣者羣臣莫及也哲宗親政呂汲公
欲遷殿中侍御史楊畏為諫議大夫忠宣曰天子諫官

當用正人楊畏不可用汲公方約畏為助謂忠宣曰豈以楊畏嘗言公耶忠宣曰不知也蓋上初召忠宣畏嘗有言上不行忠宣故不知也忠宣因乞罷政上不許後楊畏首叛汲公凡可以害汲公者無所不至又李清臣首建紹述之議多害正人一日哲宗震怒謂門下侍郎蘇轍曰卿安得以秦皇漢武上比先帝蘇門下下殿待罪呂汲公等不敢仰視忠宣從容言曰史稱武帝雄材大略為漢七制之主蓋近世之賢君蘇轍果以比先帝

非謗也陛下親政之初進退大臣不當如訶叱奴僕哲
宗怒少霽罷朝蘇門下舉笏以謝忠宣曰公佛地位中
人也蘇公與忠宣同執政忠宣寡言蘇公平昔若有所
疑至此方知其賢忠宣屢乞罷政出知陳州章惇用事
元祐黨禍起忠宣獨不預至呂汲公南遷忠宣齋戒上
書救汲公惇怒亦謫節度副使永州安置忠宣欣然而
往每諸子怨章惇忠宣必怒止之江行赴貶所舟覆扶
忠宣出衣盡濕顧諸子曰此豈章惇為之哉至永州公

之諸子聞韓維少師謫均州其子告章惇以少師執政日與司馬公議論多不合得免行欲以忠宣與司馬公議役法不同為言求歸白公公曰吾用君實薦以至宰相同朝論事不合即可汝輩以為今日之言不可也有愧而生者不若無愧而死諸子遂止元符末哲宗升遐上皇即位之初欽聖皇太后同聽政忠宣公自永州先以光祿卿分司南京鄧州居住蓋二聖欲用公矣遣中使至永州賜茶藥密諭曰皇帝與太皇太后甚知相公

在先朝言事忠直今虛位以待相公不知目疾如何用
何人醫治只為左右有不是當人阻隔相公公頓首謝
又曰太后問相公官家即位行事如何天下人何說公
曰老臣與遠方之人唯知鼓舞聖德又曰天下有不便
事但奏來公曰敢不奉詔又曰鄧州且去否公曰已出
望外如歸鄉里又曰離闕下日二聖再三言太后在宮
中皇帝在藩邸甚知相公是直臣公感泣不已俄進右
正議大夫提舉嵩山崇福宮繼復觀文殿大學士中太

一宮使召赴闕供職而公病詔書有豈唯尊德尚齒昭示寵優庶幾鯁論嘉謀日聞忠告之語公捧詔泣曰上果用我矣目明全失風痺不隨恩重命輕死有餘責將至畿內上又遣中使賜銀合茶藥促公入覲仍宣渴見之意公曰老臣昏忘不可勉強中使曰朝廷有優禮公曰老臣命薄虛蒙聖眷又遣中使賜銀絹各五百以繼道路之費又遣國醫診視所須並出內府一錢不得取於公家候公疾愈乃得歸公乞歸賴昌養疾上不得已

許之每見輔臣問安否乃曰范某得一識面足矣上知公不能起始命相公疾少間令醫者在門不許受私謝乃以天寧節所得冠帔請換服色上批其奏曰冠帔可留與骨肉醫者之服依所請卿忠言嘉謀宜時有陳奏以副朕眷待耆德求治之意公表謝復告老詔不允比詔至公已薨矣上與太皇太后聞震悼出涕先是公疾革精識不亂諸子侍讀口占遺表凡八事命門生李之儀次第之內一事云苦宣仁之謗議未明致保佑之憂

勤不顯皆權臣務快其私憤非泰陵實謂之當然蓋忠
宣思所以報宣仁后之託也諸子以其所言皆朝廷大
事且防後患以公口占畫一繳申潁昌府用府印寄軍
資庫公將葬李之儀作行狀且論平生立朝行己之大
節蔡京用事小人附會言公之子正平等撰造中使至
永州傳宣聖語以為遺表非公意也正平與李之儀皆
下御史獄捶楚甚苦正平之儀欲誣服其傳宣中使獨
不服曰舊制凡傳聖語受本於御前請寶印出注籍於

內東門遣使受聖語籍中使從其家得永州傳宣聖語
本有御寶如所言又驗內東門受聖語籍亦同又下潁
昌府取正平所繳納遺表八事皆實獄遂解正平猶羈
管象州之儀羈管太平州正平之家死于嶺外者十餘
人獨正平遇赦得歸不出仕終身為選人蔡京者紹聖
初為戶部尚書欲結后戚向氏墳寺事下開封府正平
為開封府縣尉往按視其地日向氏寺地步已足民田
不可奪府以其言聞哲宗怒京贖銅二十斤京由此恨

正平故欲誣殺之嗚呼使忠宣無恙相上皇於初載天下豈復有今日之甌公既病不能朝上皇始命相曰曾布與蔡京云

嘉祐中李參自荆南帥召為三司使參政孫抃曰參刻剝聚斂之材不可用改羣牧使蓋祖宗不以財計用人至仁宗朝大臣所宗尚如此元豐初薛向自三司使除同知樞密院雖以能吏治曉財用進時朝廷下州縣令民戶養保馬天下以為不便宰執堅行之向獨以為不

可以本官責知隨州既死至元祐初錄其言謚恭敏

聞見錄卷十四

欽定四庫全書

聞見錄卷十五

宋 邵伯溫 撰

程宗丞先生名顥字伯淳弟侍講先生名頤字正叔康節先公以兄事其父太中公二先生皆從康節遊其師曰周敦頤茂叔宗丞為人清和侍講為人嚴峻每康節議論宗丞心相契苦無所問侍講則時有往復故康節嘗謂宗丞曰子非助我者然相知之盡二先生則同也橫渠張先生名載字子厚弟戩字天祺為二程先生之

表叔子厚少豪其才欲結客取熙河鄯鄯之地范文正公帥延安聞之館於府第俾修制科與天祺皆登進士第方同二程先生修中庸大學之道尤深於禮熙寧初子厚為崇文院校書天祺與伯淳同為監察御史時介甫行新法伯淳自條例司官為御史與臺諫官論其不便俱罷上猶主伯淳介甫亦不深怒之除京西北路提點伯淳力辭乞與同列俱貶改澶州簽判天祺尤不屈一日至政事堂言新法不便介甫不答以扇障面而笑

天祺怒曰參政笑某不知天下人笑參政也趙清獻公
同參大政從旁解之天祺曰公亦不可謂無罪清獻有
愧色謫監鳳翔府司竹監舉家不食筍其清如此未幾
卒於官子厚亦求去熙寧十年吳亢丞相當國復召還
館康節已病子厚知醫亦喜談命診康節脉曰先生之
疾無慮又曰頗信命否康節曰天命某自知之世俗所
謂命某不知也子厚曰先生知天命矣尚何言子厚入
館數月以病歸過洛康節已捐館折簡慰撫伯溫勤甚

見二程先生曰某之病必不起尚可及長安也行至臨
潼縣沐浴更衣而寢及旦視之亡矣門生袁經挽車葬
鳳翔之橫渠是謂橫渠先生伯淳自澶州請監洛河竹
木務以便親除判武學未赴以中丞李定言罷知開封
府扶溝縣失囚謫汝州監酒元祐初以宗正丞召將大
用未赴卒葬伊川文潞公表其墓曰明道先生正叔元
祐初用司馬溫公呂申公薦召對初除職官再除館職
除崇政殿說書歲餘出判西京國子監兩除直秘閣不

拜紹聖中坐元祐黨謫涪州遇上皇即位赦得歸久之
復官以卒是謂伊川先生三先生俱從康節遊康節尤
喜明道其譽之與富韓公司馬溫公呂中公相等故康
節四賢詩云彥國之言鋪陳晦叔之言簡當君實之言
優游伯淳之言調暢四賢洛之觀望是以在人之上有
宋熙寧之間大為一時之壯則康節之所以處明道者
盛矣一日二程先生侍太中公訪康節於天津之廬康
節攜酒飲月陂上歡甚語其平生學術出處之大明日

悵然謂門生周純明曰昨從堯夫先生遊聽其論議振
古之豪傑也惜無所用於世純明曰所言何如明道曰
內聖外王之道也是日康節有詩云草軟波平風細溜
雲輕日淡柳低摧狂言不記道何事劇飲未嘗如此盃
好景只知閒信步朋歡那覺大開懷必期快作賞心事
却恐賞心難便來明道和云先生相與賞西街小子親
攜几杖來行處每容參劇論坐隅還許瀝餘盃檻前流
水心同樂林外青山眼重開時泰心閒兩難得直須乘

興數追陪明道敬禮康節如此故康節之葬伯溫獨請誌其墓焉悲夫先生長者已盡其遺言尚存伯溫自念暮景可傷不可使後生無聞也因具載之

元符末呂惠卿罷延安帥陸師閔代之有訴惠卿多以人冒功賞者師閔以其事付有司未竟罷去曾布為樞密使素與惠卿有隙特自太原移德孺延安蓋德孺於惠卿亦有隙也德孺至取其事自治有自皇城使追奪至小使臣者德孺由是大失邊將之心議者謂其詞於

前政事已在有司德孺乃取以自治失矣德孺聰明過人而為曾布所使惜哉未幾德孺亦以論役法罷如忠宣丞相則不然公帥慶陽時為總管种詒無故訟於朝上遣御史按治詒停任公亦罷帥至公樞密副使詒尚停任復薦為永興軍路鈐轄又薦知隰州公每自咎曰先人與种氏上世有契義某不肖為其子孫所訟寧論事之曲直哉嗚呼可謂以德報怨者也以德孺之賢於是乎有愧於忠宣矣

田畫者字承君陽翟人故樞密宣簡公姪也其人物雄偉議論慷慨俱有前輩之風鄒浩志完者教授潁昌與承君遊相樂也浩性懦因得承君故遇事輒自激勵元符間承君監京城門一日報上召志完承君為之喜又一日報志完賜對承君益喜監門法不許出志完亦不來久之志完除言官承君始望志完矣志完遣客見承君以測其意客問承君近讀何書承君曰吾作墨子詩有知君既得雲梯後應悔當年泣染絲之句為鄒志完

發也客言於志完志完折簡謝承君辭甚苦因約相見承君曰斯人尚有所畏未可絕也取告見之問志完曰平生與君相許者何如今君為何官志完愧謝曰上遇羣臣未嘗假以聲色獨於某若相喜者今天下事故不勝言意欲待上益相信而後發貴有益也承君許之既而朋黨之禍大起時事日變更承君謝病歸陽翟田舍一日報廢皇后孟氏立劉氏為皇后承君告諸子曰志完不言可以絕交矣又一日志完以書約承君會類

昌中塗承君喜甚亟往志完具言諫廢立皇后時某之言慙矣上初不怒也某因奏曰臣即死不復望清光矣下殿拜辭以去至殿門望上猶未興凝然若有所思也明日某得罪志完承君相留三日臨別志完出涕承君正色責曰使志完隱默官京師遇寒疾不汗五日死矣豈獨嶺海之外能死人哉願君無以此舉自滿士所當為者未止此也志完茫然自失歎息曰君之贈我厚矣乃別去建中靖國初承君入為太宗丞宰相曾布欲收

置門下不能屈除提舉常平亦辭請知淮陽軍以去吏民畏愛之歲大疫承君日自挾醫戶問病者藥之良勤一日小疾不出止晝一軍之人盡見承君擁騎從騰空而去就問之死矣或曰為淮陽土神云

儒釋之道雖不同而非特立之士不足以名其家近時伯溫聞見者二人大儒伊川先生程正叔元祐初用司馬溫公薦侍講禁中時哲宗幼冲先生以師道自居後出判西京國子監兩加直祕閣皆辭之黨禍起謫涪州

先生注周易與門弟子講學不以為憂遇赦得歸不以為喜長老道楷者崇寧中以朝廷命住京師法雲寺上一日賜紫方袍及禪師號楷曰非吾法也却不受中使譖於上以為道楷擲敕於地上怒下大理寺杖之理官知楷為有道者欲出之問曰師年七十乎曰六十九矣有疾乎楷正色曰某平生無病上賜杖官不可輒輕之遂受杖無一言自此隱沂州芙蓉溪從之者益盛朝廷數有旨復命為僧不從嗚呼二人者雖學不同皆特立

之士也為僧為釋而不以道者聞其風可以少愧矣

程伯淳先生嘗曰熙寧初王介甫行新法並用君子小人君子正直不合介甫以為俗學不通世務斥去小人苟容諂佞介甫以為有材能知變通用之君子如司馬君實不拜同知樞密院以去范堯夫辭同修起居注得罪張天祺自監察御史面折介甫被謫介甫性狠愎衆人以為不可則執之愈堅君子既去所用皆小人爭為刻薄故害天下愈深使衆君子未用與之敵俟其勢久

自緩委曲平章尚有聽從之理但小人無隙以乘其為害不至此之甚也天下以先生為知言

陳瓘字瑩中閩人有學問年十八登進士甲科紹聖初用章惇薦為太學博士先是惇之妻嘗勸惇無修怨惇作相專務報復首起朋黨之禍惇妻死惇悼念不堪瑩中見惇容甚哀謂惇曰公與其無益悲傷曷若念夫人平生之言蓋譏惇之報怨也惇以為忤不復用曾布為相薦瑩中為諫官為都司蔡卞據王安石日錄改修神

宗實錄曾布亦主熙寧元豐之政瑩中上布書講示尊私史以壓宗廟及論時政之不當時布又以為忤出之瑩中為諫官時為上皇極言蔡京蔡卞不可用用之決亂天下蔡京深恨之屢竄責例用赦放歸猶隸通州一日瑩中之子走京師言蔡京事詔下獄明州捕瑩中甚急士民哭送之瑩中不為動既入獄見其子被繫笑曰不肖子煩吾蔡京用酷吏李孝壽治其事孝壽坐廳事簾中列五木於庭引瑩中問之瑩中從容曰蔡京之罪

某實知之不肖子不知也多求紙自書孝壽懼以瑩中
為不知情即日放歸再隸通州其子配海上瑩中撰尊
堯集以辯王安石妄作日錄以詆祖宗詆神宗者今行
於世靖康初不及大用以死特贈諫議大夫瑩中晚喜
康節先生之學嘗從伯溫求遺書曰吾於康節之學若
有得也

伯溫紹聖初監永興軍錢監呂晉伯龍圖居里第數見
之深蒙器愛伯溫罷官貧不能歸用茶司薦為屬官一

日見呂公公曰君亦為此官何耶選人作諸司屬官使臣為走馬承受則一生不可作他官矣伯溫對以故公曰為親為貧則可也公丞相汲公之兄性剛直謹禮法為從官歸鄉見縣令必致桑梓之恭待部吏如子弟多面折其短而樂於成人雖丞相亦未嘗少假顏色也一日至府第坐堂上丞相夫人拜庭下命二婢子掖之公怒曰人以為丞相夫人吾但知呂二郎新婦耳不疾病輒用人扶何也丞相為之愧謝乃已每勸丞相辭位以

避滿盈之禍紹聖中丞相南遷公帥平涼議邊事不合
移帥秦又與鍾傳議不合亦忤章惇降待制知同州致
仕復龍圖閣直學士嗚呼呂公今之古人也伯溫尚及
見之記其平生之言如此

本朝古文柳開仲塗穆脩伯長首為之唱尹洙師魯兄
弟繼其後歐陽文忠公早工偶儷之文故試於國學南
省皆為天下第一既擢甲科官河南始得師魯乃出韓
退之文學之公之自敘云爾蓋公與師魯於文雖不同

公為古文則居師魯後也如五代史公嘗與師魯約分撰故公謫夷陵日貽師魯書曰開正以來始似無事始舊更前歲所作十國志蓋是進本務要卷多今若便為正史盡合刪削存其大者細小之事雖有可紀非干大體自可存之小說不足以累正史數日檢舊本因盡刪去矣十亦去其三四師魯所撰在京師時不曾細看路中細讀乃大好師魯素以史筆自負果然河東一傳大妙修本所取法於此傳亦有繁簡未中者願師魯刪之

則盡善也正史更不分五史通為紀傳今欲將梁紀并漢周修且試撰以唐晉師魯為之如前歲之議其他列傳約略且將逐代功臣隨紀各自撰傳待續次盡將五代列傳姓名寫出分為二分手作傳不知如此於師魯如何吾輩棄於時聊欲因此粗伸其志少希後世之名如脩者幸與師魯相依若成此書亦是榮事今特告朱公遣此介奉咨希一報如何便各下手只候任進歸便令貴國志草本去次云云其後師魯死無子今歐陽公

五代史頒之學官盛行於世內果有師魯之文乎抑歐陽公盡為之也歐陽公誌師魯墓論其文曰簡而有法公曰在孔子六經中唯春秋可當則歐陽於師魯不薄矣崇寧間改修神宗正史歐陽公傳乃云同時有尹洙者亦為古文然洙之才不足以望脩云蓋史官皆晚學小生不知前輩文字淵源自有次第也

聞見錄卷十五

欽定四庫全書

聞見錄卷十六

宋 邵伯溫 撰

楊凝式少師唐昭宗朝為直史館宰相涉之子也朱全忠逼唐禪位涉為奉傳國寶使凝式曰大人為唐宰相使國家至此不可為無過況乎持天子璽綬與人雖保富貴奈千載何盡辭之涉大駭曰汝欲滅吾族神色不寧者數日全忠既篡弑凝式歷梁唐晉三朝陽狂不任事累官至太子少師其書法自顏柳以入二王之妙居

洛陽延福坊每出導從輿馬在前多行於後一日欲遊
天官寺從者曰曷往廣受寺亦從之今兩寺與多寶塔
院有遺像尚存近歲劉壽臣為留臺於故按牘中得少
師自書假牒十數紙皆楷法精絕世論少師書以行草
為長誤矣

國初隱士石砥居洛陽之北邙山馮拯侍中為留守砥
每騎驢直造侍中見必拜之飲酒至醉乃去砥好作詩
多道家語有曰結網蜘蛛翻仰肚轉枝啄木倒垂頭意

謂謀利者如此又曰蝸牛角上爭閑事石火光中寄此
身意謂好利者若此洛人頗能誦之一日自城中飲酒
大醉騎驢夜歸失所在

孫覺龍圖未第時家高郵與士大夫講學於郊宮別墅
一夕晦夜忽月光入窗隙孫異之與同舍望光所在行
二十里餘見大珠浮遊湖面上其光燭天旁照遠近有
崔伯易者作感珠賦記之熙寧初孫登科為河南縣主
簿自云

周長孺字士彥澶淵人楊寔榜登第為渭州共城縣令師得曰邵康節先生士彥事先生以古弟子禮先生告以先天之學士彥性剛過事輒發既從先生即淡然若無意於世者其季直孺怪問之士彥慨然曰此吾得於先生者士彥在共城獵近郊有兔起草間自射中之即其處不復見兔石刻其文曰士彥當都而卒後士彥每至京師必遽歸不敢留治平末以都官員外郎知劍州普城縣卒喪歸過洛貧不能行康節留其家經紀甚備

教其子純明以學問為娶程伊川先生之姪純明後登
元祐三年進士第士彥因獵得石刻驗於數十年之後
與漢滕公佳城事相類異哉

張唐英者天覺丞相兄也丞相少受學於唐英唐英有
史才嘗作宋名臣傳蜀檣杭行於代熙寧元年春以前
御史服除還京朝過洛府尹同僚屬出賞花皆不見唐
英題詩傳舍云先帝昭陵土未乾又聞永厚葬衣冠小
臣有淚皆成血忍向東風看牡丹尹聞之遽遣書為禮

却而不受蓋仁宗山陵初成英宗厭代賴唐英還朝不得歸臺不然河南尹者不免矣

皇祐初洛陽南資福院有僧錄義琛者素出入尹師魯門下師魯自平涼帥謫崇信軍節度副使均州監酒過洛義琛見之曰鄉里門徒數人欲一望見龍圖有頃諸人出一喏而去皆洛中大豪義琛已密約貸錢為師魯買洛城南宮南村負郭美田三十頃師魯初不知后義琛復以歲所得地利償諸人至師魯卒喪歸洛義琛哭

樞前納其券於師魯家師魯素貧子孫賴此以生嗚呼
在仁宗朝一僧尚負義如此風俗可謂厚矣康節先生
與義琛善每稱之也

陝西豪士劉易多遊邊喜談兵寶元康定間韓魏公宣
撫五路薦於朝賜處士號易善作詩魏公為書或不可
其意則發怒洗去魏公欣然再書不憚尹師魯帥平涼
延易府第尊禮之狄武襄代師魯遇之亦厚每燕設易
嗜食苦馬菜不得即叫怒無禮邊城無之狄公為求於

內郡后每燕集終日唯以此菜啗之易不能堪方設常饌時稱狄公善制也

謝希深幼子景平初任為大理評事監光化軍稅有兵官者為本廳軍員持以事兵官常憂鬱不樂景平一日問之兵官泣訴景平曰君當解官去吾必能報之兵官去景平因權軍事呼軍員詰之曰老兵何敢持兵官使罷任去軍員者無賴大言曰景平但可飲酒擊鞠耳此事不當預景平以犯階級送獄獄成決配之希深一時

有大名其諸子皆賢景平居幼尚有家風云

祖無擇字擇之蔡州人少從穆伯長為古文后登甲科
嘉祐中與王介甫同為知制誥擇之為先進時詞臣許
受潤筆物介甫因辭一人之饋不獲義不受以其物置
舍人院梁上介甫以母憂去擇之取為本院公用介甫
聞而惡之以為不廉熙寧二年介甫入為翰林學士拜
參知政事權傾天下時擇之以龍圖閣學士右諫議大
夫知杭州介甫密諭監司求擇之罪監司承風旨以贓

濫聞於朝廷遣御史王子韶按治子韶小人也攝擇之下獄鍛鍊無所得坐送賓客酒三百小瓶責節度副使安置元豐中復祕書監集賢院學士移知光化軍以卒士大夫寬之同時有知明州光祿卿苗振監司亦因觀望發其贓罪朝廷遣崇文院校書張載按治載字子厚所謂橫渠先生者悉平反之罪止罰金其幸不幸有若此者也

嘉祐中有李殿丞者知濟源縣魏廣者主簿汜水人二

人素相好一日會府中李被酒謂廣曰我果官達當薦君為屬未幾河南倖闕李又攝之遂擢廣權幕官相從益歡監司以燕會數俱罷歸故官廣先去李餞於東門席上賦詩有曰今日不知明日事人情反復似車輪我今自是飄萍客更向長亭作主人蓋當時朝廷文法寬所用監司皆長者故能容州縣之吏如此任道司門為康節先生云

薛球肅之為梓州路提刑市有道人賣兔毫筆者以蜀

中所無也因呼之見其目光射人因問其所得絕不言而去道中為余言如此道中名元實有禮學嘗為尚書郎其為人忠信不妄云

長安百姓常安民以鑄字為業多收隋唐銘誌墨本亦能篆教其子以儒學崇寧初蔡京蔡卞為元祐姦黨籍上皇親書刻石立於文德殿門又自書頒於天下州治廳事長安當立召安民刊字民辭曰民愚人不知朝廷立碑之意但元祐大臣如司馬相公者天下稱其正直今謂之

姦邪民不忍鑄也府官怒欲罪之民曰被役不敢辭乞
免刻安民二字於碑恐後世并以為罪也嗚呼安民者
一工匠耳尚知邪正畏過惡賢於士大夫遠矣故余以
表出之

聞見錄卷十六

欽定四庫全書

聞見錄卷十七

宋 邵伯溫 撰

長安張衍年八十以術遊士大夫間其為人有忠信識道理章子厚蔡持正官州縣時許其為宰相蒲傳正薛師正未顯皆以執政許之紹聖初余官長安因論范忠宣公命衍曰范丞相命甚似其父文正公正艱難中僅作參知政事耳余曰忠宣為相何也衍曰今朝廷貴人之命皆不及所以作相又曰古有命格今不可用古者

貴人少福人多今貴人多福人少余問其說衍曰昔之命出格者作宰執次作兩制又次官卿監為監司大郡享安逸壽考之樂任子孫厚田宅雖非兩制福不在其下故曰福人多貴人少今之士大夫自朝官便作兩制忽罷去但朝官耳不能任子孫貧約如初蓋其命發於刑殺未久即災至故曰貴人多福人少也余又以問時為監司者張芸叟陸孝叔邵仲恭吳子平數公命問之衍曰皆帶職正郎員外郎耳取進於此即不可獨仲恭

數促其后芸叟為侍郎孝叔待制未幾皆謫官孝叔帥
熙子平帥秦尋卒仲恭邯鄲移常州卒年五十五三公
皆直龍圖無一不如衍之言者章子厚作相意氣方盛
因其姪緯不用其言亦不怒也后遂有崖州之禍蔡持
正以門客假承務郎奏衍賞其術衍與總領市吳宮田
舜卿善衍有錢數千緡舜卿為買田以官戶名占之后
舜卿賊敗官籍其產衍之田在焉或勸衍自陳衍曰衍
故與田君善田君占衍之地美意也田君不幸至此衍

論於有司非義也卒不請其田士大夫多稱之行病余見之則曰數已盡某日當死凡家事悉處之矣公其記之已而果然

河南甯氏其先錢塘人名承訓者事吳越王以才武稱錢氏歸朝授左侍禁子直大中祥符元年姚暉榜登甲科為明州慈縣令卒妻李氏更嫁任恭惠公布直有子李置於甯氏族人以去族人家破有故老媪收養之任公守越州客或問甯氏子無恙公愕然歸問夫人夫人

泣曰初不欲以兒累公留於甯氏之族族破今流落矣
任公閱焉多以金帛求得之年五歲公教育之如已子
遂冒任姓名適公知樞密院欲官之夫人泣辭且謂適
發憤讀書景祐初登進士第夫人方為之喜夫人死任
公謂適曰前不欲任以官者成其志也今當再薦以示
無間其無辭適泣謝遂以公薦轉太常寺太祝又奏其
子以官任公薨適解官持喪如父服自聞於朝乞還姓
甯氏因納任公所奏之官有旨許歸姓不許納官與任

氏兄弟相持而哭乃別去故任甯世為婚姻適更名后
通籍贈其父直為太常博士終尚書職方員外郎福建
路運判若子若孫若曾孫數十人多知名士遂為洛陽
大家

河南劉氏自名環雋者事齊魏為中書侍郎子坦事隋
文帝贈尚書右丞子政會事唐高祖太宗為洪州大都
督既死太宗手勅曰政會昔預義舉有殊勲贈戶部尚
書謚襄配享高祖廟圖形凌煙閣子元意襲爵封渝國

公事太宗尚南平公主弟元象主客郎中元育益州刺史元意之子名奇長壽中為天官侍郎論則天革命下獄死弟循金吾衛將軍子慎知幼居父喪奉其母居伊南一日羣盜至衆走慎知獨不動盜怪問則曰母老且病不可行唯有同生死耳盜感其義而去賴之以免弟超河南少尹微吳郡太守微之子裴開元中以功臣之後賜進士第為濟州東阿縣令服後母喪以毀卒子藻祕書郎弟全成方平皆有文方平之子符寶厯二年擢

第至戶部侍郎贈司徒八子崇龜崇彝崇聖崇魯崇纂
崇珪崇瓌崇珎皆有官崇珪子岳天福四年登進士第
事後唐明宗為吏部侍郎贈司徒子溫叟事本朝太祖
皇帝為御史中丞太祖一日與數謁者登正陽門之西
樓溫叟自臺歸過其下或告溫叟當避溫叟不顧明日
求對面謝曰陛下御前樓則六軍必有希賞賜者臣所
不避者欲陛下非時不御樓也太祖大悅出內帑三千
緡付有司自罰太宗尹開封知其貧以五百千錢遺之

溫叟受而不辭對其使局記於西廂至明年太宗復遣其使餉以酒使者視其局記如故歸白其事太宗歎息曰吾之錢尚不肯受況他人者乎仍命輦歸以成其美名憲臺故事月給滄錢一萬不足以贓罰充之溫叟惡其名不取太祖因與太宗從容論廷臣之有名節者太宗以送錢事聞太祖歎美久之後求退太祖曰俟朕選有守道正直如卿者即可代子炤太宗朝為贊善大夫燧登進士第為龍圖閣直學士權開封府明肅太后朝

獨召對后曰知卿名族十數世欲一見卿家譜恐與吾同宗也燧曰不敢后數問之度不可免因陛對為風眩仆而出乞出知河南府再召懇避不行求為留司御史臺以卒燧七子貺几先忱兆兢几登科嘗因陛對奏仁宗不進家譜事上稱歎久之忱為監司郡守有聲唐老元和為右正言自北齊至本朝五百餘年而劉氏不衰洛陽多大家世以譜牒相付授甯氏劉氏尤為著姓有可傳者

康節先公曰昔居衛之共城有趙及諫議者自三司副使以疾乞知衛州多名醫故也有申受者善醫自言得術於高若訥參政得脉於郝氏老其說謂高參政醫學甚高既貴診脉少故不及郝老非郝老不可治趙如其言郝氏至診其脉曰有沉積當下趙服其藥暴下不止已垂殆郝老乃坐趙於大盆中用椀覆其頭項以湯沃之遂甦趙呼申受罪之曰君謬舉郝老者申受曰某之術不及郝老遠甚公病當下但氣虛藥劑苦大不能禁

然宿疾良已可賀又曰郝老之脉通神公舉家之人坐帳中俾遍診脉其老少男女已未嫁娶無不知者趙試其說信然始加禮自此疾平復入為三司副使申受朝廷用為太醫丞郝老本河朔人既死張岫子堅誌其墓載其平生所治甚異曰士人之妻孕診其脉曰六脉皆絕反用子氣資養故未死子生母即死矣已而果然郝老平時不合藥未諸藥遇病品量增減之服者無不驗外從其學者皆名醫云

洛中形勢邾鄆山在西邛山在北成臯在東以接嵩闕
塞直其南屬女几連荆華至終南山洛水來自西南伊
水來自南右澗水左瀍水隋文帝登邛山對闕塞而歎
曰真天闕也今之洛城也周公所卜在其西北邾鄆二
山相屬定鼎於邾鄆是也前臨澗洛二水故曰穀洛闕
將毀王宮也洛誥曰我又卜瀍水東亦惟洛食東漢洛
陽是也在今洛城之東十八里跨洛水前直轅轅北屬
邛山極平遠西晉後魏皆都焉晉又築金墉城在其西

北其山川秀潤有餘形勢雄壯差不逮長安長安東峻
函東南荆華以屬終南山面南太白雞足山又西秦隴
岐山北梁山東北雷首中條山與平陽諸山相屬涇渭
滹沱瀉澇之水在其後前左右以入於河故堯都平
陽舜都蒲坂周都岐山文王都豐武王都鎬秦初建國
於秦後遷岐山之陽今寶雞是也穆公羽陽宮故基三
良墓尚存至始皇都咸陽跨渭水為阿房宮西漢都秦
宮之東今未央長樂章臺諸宮城闕尚存隋文帝初都

漢宮後遷稍東枕龍首渠山築長安新城制度甚壯南
接華嚴川以祝南山北臨渭水城南北三千餘里東南
二千餘里漢末未央宮在其苑囿中唐因為都又起東
內今含元殿太液池故基尚存又起南內謂之興慶宮
今池殿故基亦在自東築夾城複道南至興慶宮又南
至曲江東跨灊澹以屬驪山山上起羯鼓望京樓山下
起華清宮宮有溫泉以白玉石為芙蓉出水為御湯遵
花湯太子湯百官湯其宮闕北臨渭水由華清宮東離

宮相望以屬東都自堯舜周秦漢唐都城皆相近高山大河平川沃野形勢壓天下洛陽民俗和平土宜花竹長安尚有秦漢游俠之風地多長楊花老槐耕桑最盛古稱陸海前代英雄必得此然後可以有為今陸沉於北狄惜哉

洛中風俗尚名教雖公卿家不敢事形勢人隨貧富自樂於貨利不急也歲正月梅已花二月桃李雜花盛三月牡丹開於花盛處作園囿四方伎藝舉集都人士女

載酒爭出擇園亭勝地上下池臺間引滿歌呼不復問
其主人抵暮遊花市以筠籠賣花雖貧者亦戴花飲酒
相樂故王平甫詩曰風暄翠幕春沽酒露濕筠籠夜賣
花姚黃初出邙山後白司馬坡下姚氏酒肆水地諸寺
間有之歲不過十數枝府中多取以進次曰魏花出五
代魏仁浦樞密園池中島上初出時園吏得錢以小舟
載遊人往過他處未有也自餘花品甚多天聖間錢文
僖公留守時歐陽公作花譜才四十餘品至元祐間韓

王汝丞相留守命留臺張子堅續之已百餘品矣姚黃
自穠綠葉中出微黃花至千葉魏花微紅葉少減此二
品皆以姓得名特出諸花之上故洛人以姚黃為王魏
花為妃云余去鄉久矣政和間為過之當春時花園花
市皆無有問其故則曰花未開官遣人監護用開盡檻
土移之京師籍園人名姓歲輸花如租稅洛陽故事遂
廢余為之歎又追記其盛時如此

河中府河東縣永樂鎮唐永樂縣也本朝熙寧初廢為

鎮面大河背雷首中條山形勢雄深安史之亂土人多
避地於此有姚孝子莊孝子名栖筠唐貞元中為農當
戍邊栖筠之父語其兄曰兄嗣未立弟已有子請代兄
行遂戰歿時栖筠方三歲其後母再嫁鞠於伯母伯母
死栖筠葬之又招魂葬其父廬於墓側終身哀慕不衰
縣令蘇輒以俸錢買地開阡陌刻石表之河東尹渾城
上其事詔加優賜旌表其閭名其鄉曰孝悌社曰節義
里曰欽愛栖筠生岳岳生君儒君儒生師正岳至師正

仍世廬墓至本朝慶厯中再加旌表元祐中縣令王闢之以狀列於朝乞詔史官書之蓋自唐以來孝義之風不少變政和甲午余過其家長少列拜庭下以次升堂侍立應對有禮道其家世次第甚詳蓋自栖筠而下義居二十餘世矣余為之低回歎息而去其村人為余言姚氏世推尊長公平者主家子弟各任以事專以一人守墳墓近度為僧亦廬墓側早晚於堂上聚食男子婦人各行列以坐小兒席地共食於木槽飯罷即鎖厨門無

異爨者男女衣服各一架不分彼此有子弟新娶私市
食以遺其妻妻不受納於尊長請杖之望其墓林木蔚
然洒埽種藝至謹有田十頃僅給衣食稅賦不待催驅
未嘗以訟至縣庭今三百餘年守其家法無異辭者經
唐末五代之亂全家守墳不去熙寧間陝右歲歉舉族
百口同往唐鄧間就食比其返不失一人政和中取粟
麥於民謂之均糴姚氏力不給舉家日夜號泣欲亡去
余聞之惻然諭縣官曰孝義之門忍使至此為作狀申

府申監司得免焉嗚呼永樂陷沒姚氏為虜民不知其存亡矣因具書之

樞密章公案謂余曰某初官入川妻子乘驢某自控兒女尚幼共以一驢馱之近時初官非車馬僕從數十不能行可歎也前輩勤儉不自侈大蓋如此因錄之

紀公實為余言嘗聞其父言王冀公欽若以使相尹洛振車騎入城士民聚觀富韓公方為舉子與士人魏叔平段希元一張姓者同觀於上東門裏福先寺三門上

門高富公魁偉三人者挽之以登見其旌節導從之盛
富公歎曰王公亦舉子耶三人者曰君何歎安知吾輩
異日不爾也後富公歷將相以三公就第年八十乃薨
謚曰文忠其名位不在冀公之下而功德則過之魏叔
平段希元至富公為宰相以特奏名命官張姓者窮老
而死云

熙寧初洛陽有老人党翁者賣藥日於水南北往來行
步甚快少年不及也自言五代清泰年為兵營事柴世


宗有放傳公帖可驗戴卷脚幘頭衣黃衫繫革帶猶唐裝也有妻無子問其事則不答至元豐中不知所在余嘗親見之亦異人矣

有關中商得鸚鵡於隴山能人言商愛之偶以事下有司獄旬日歸輒歎恨不已鸚鵡曰郎在獄數日已不堪鸚鵡遭籠閉累年奈何商感之携往隴山泣涕放之去後每商之同輩過隴山鸚鵡必於林間問郎無恙託寄聲也瀘南之長寧軍有畜秦吉了者亦能人言有夷酋

欲以錢伍拾萬買之其人告以苦貧將賣爾秦吉了曰
我漢禽不願入夷中遂勁而死嗚呼士有背主忘恩與
甘心異域而不能死者曾秦吉了之不若也故表出之
余為西蜀憲其治在嘉州州之西有花將軍廟將軍英
武見於杜子美之詩廟史以匣藏唐至德元年十月鄭
丞相告云花驚定將軍也是歲土蕃陷雋州將軍與丞
相豈同功者耶告後列金紫光祿大夫左相幽國公臣
正議大夫門下侍郎平章事博陵縣開國男臣不書姓

名右相闕銀青光祿大夫行中書侍郎平章事姓名磨滅謹按至德元年肅宗初即位於靈武右丞相楊國忠誅死故闕之是歲六月丙午劍南節度使崔圓為中書侍郎平章事七月庚午武部尚書平章事韋見素為左相蜀太守崔渙為門下侍郎平章事其不書姓名磨滅者此三人無疑矣中書省官臣書姓名門下省官臣不書姓名當時節度廢闕如此然花將軍之名驚定唯得於此告也或云將軍丹稜東館人今東館廟貌尤盛云

廟史又出本朝乾德三年二月二十六日偽蜀主孟昶
偽蜀太子孟元喆以降入朝舟過廟下祭文二紙墨色
如新其窘急悲傷之詞讀之亦令人歎息云



聞見錄卷十七

欽定四庫全書

子部
聞見錄卷十八至二十

詳校官監察御史臣邱文愷

侍讀臣孫球覆勘

總校官進士臣繆琪

校對官中書臣王家賓

膳錄舉人臣胡念祖

欽定四庫全書

聞見錄卷十八

宋邵伯溫撰

伯溫曾祖母張夫人遇祖母李夫人嚴甚李夫人不能堪一夕欲自盡夢神人令以玉筋食羹一杯告曰無自盡當生佳兒夫人信之後夫人病瘦醫者既投藥又夢寢堂門之左右木瓜二株右者已枯因為大父言大父遽取藥令覆之及期生康節公同墮一死胎女也後十餘年夫人病卧堂上見月色中一女子拜庭下泣曰母不察

庸醫以藥毒兒可恨夫人曰命也女子曰若為命何兄
獨生夫人曰汝死兄獨生乃命也女子涕泣而去又十
餘年夫人再見女子來泣曰一為庸醫所誤二十年方
得受生與母緣重故相別又涕泣而去則知釋氏輪迴
鬼神之說有可信者康節知而不言者也親謂伯母當
作某云

伊川丈人與李夫人因山行於雲霧間見大黑猿有感
夫人遂孕臨蓐時慈烏滿庭人以為瑞是生康節公公

初生髮被面有齒能呼母七歲戲於庭蟻穴中豁然別
見天日雲氣往來久之以告夫人夫人至無所見禁勿
言既長游學晉州山路馬突同墜深澗中從者攀緣下
尋公無所傷唯壞一帽熙寧十年公年六十七矣夏六
月屬微疾一日晝睡覺且言曰吾夢旌旗鶴鴈自空而
下下導吾行亂山與司馬君實呂晦叔諸公相分別於
一驛亭回視其壁間有大書四字曰千秋萬歲吾神往
矣無以醫藥相逼也嗚呼異哉

太學博士姜愚字子發京師人長康節先公一歲從康節學稱門生先公年四十五未娶潞州張仲賓太博字穆之自未第亦從康節子發與二君同白康節曰不孝有三無後為大先生年踰四十不娶親老無子恐未足以為高康節曰貧不能娶非為高也子發曰某同學生王允修頗樂善有妹甚賢似足以當先生穆之曰先生欲婚則某備聘令子發與王允修言之康節遂娶先夫人後二年伯溫始生故康節有詩云我今行年四十七

生男方始為人父鞠育教誨誠在我壽夭賢愚繫於汝
我若壽命七十歲眼前見汝二十五我欲願汝成大賢
未知天意肯從否子發本京師富家氣豪樂施登進士
第月分半俸奉康節治平間知壽州六安縣以目疾分
司居新鄉子發死康節以其女嫁河南進士紀輝視之
如己女伯溫以姊視之元符三年紀輝與姜女俱亡今
二子樂道未遇時與子發交遊甚善樂道苦貧教小學
京師居州西子發居州東相去遠一日大雪子發念樂

道與其母寒飢自荷一杖踐雪以行至樂道之居扣門
久之方應樂道同母凍坐日已過高未飯子發惻然亟
出買酒肉薪炭往復同樂道母子附火飲食樂道覺子
發衣單問之以綿衣質錢買飯食也子發說論語士人
樂聽之為一講會得錢數百千為樂道娶妻樂道登第
調睦州判官妻卒子發又為求范文正公夫人姪汝陽
李氏以繼其負義如此熙寧初樂道以翰林侍讀學士
為西京留守子發老益貧且喪明自新鄉駕小車來見

樂道意樂道衷之也樂道遺酒三十壺而已子發殊悵然康節館於天津之廬典衣贐其行歸新鄉未幾卒

康節先公少日遊學先祖母李夫人思之恍惚至倒誦佛書康節亟歸不復出夫人捐館康節特毀甚躬自爨以養祖父置家蘇門山下康節獨築室百源之上時李成之子挺之東方大儒也權共城縣令一見康節心相契授以大學康節益自克勵三年不設榻晝夜危坐以思寫周易一部貼屋壁間日誦數十遍聞汾州任先生

者有易學又往質之挺之去為河陽司戶曹康節亦從之寓州學貧甚以飲食之油貯燈讀書一日有將校自京師出代者見康節曰誰苦學如秀才者以紙百幅筆十枝為獻康節辭而後受每舉此語先夫人吾少艱難如此當為子孫言之康節又嘗謂伯溫曰吾早歲徒步遊學至有所立艱哉程伯淳正叔雖為名士本出貴家其成就易矣因泣書之以示子孫康節先公慶厯間過洛館於水北湯氏愛其山水風俗之美始有卜築之意

至皇祐元年自衛州共城奉大父伊川丈人遷居焉門
生懷州武陟知縣侯紹曾字孝傑助其行初學天宮寺
三學院劉諫議元瑜字君玉呂諫議獻可靜居張少卿
師錫及其子職方君景伯狀元師德之子諫議君景憲
王諫議益柔字勝之子中散兄弟諤字師柔及其子孫
南國張大丞師雄及諸子劉龍圖之子祕監几字伯壽
修撰忱字明復侍講李寔字景直吳少卿執中王學士
起字仲儒李侍講育字仲象子顓字端伯姚郎中與字

周輔交遊最密或稱門生洛人為買宅於履道坊西天
慶觀東趙諫議借田於汝州葉縣后王不疑同鄉人買
田於河南延秋村康節復還葉縣之田嘉祐七年王宣
徽尹洛就天宮寺西天津橋南五代節度使安審琦宅
故基以郭崇廢宅餘材為屋三十間請康節還居之富
韓公命其客孟約買對宅一園皆有水竹花木之勝熙
寧初行買官田之法天津之居亦官地榜三月人不忍
買諸公曰使先生之宅他人居之吾輩蒙恥矣司馬溫

公而下集錢買之康節先生以詩謝王宣徽曰嘉祐壬寅歲新巢始孱功正分道德里更近帝王宮檻仰端門峻軒迎兩觀雄窗虛響灑澗臺迥繁伊嵩好景尤難得昌辰豈易逢無才濟天下有分樂年豐水竹腹心裏鶯花淵數中老來歡不已端節歎何窮嘯傲陪真侶經營荷府公丹誠徒自寫匪報自恩隆后以詩謝溫公諸公曰重謝諸公為買園買園城裏占林泉七千來步平流水二十餘家爭出錢嘉祐卜居終是儗熙寧受券遂能

專鳳凰樓下新閑客道德坊中舊散仙洛浦清風朝滿袖嵩岑皓月夜盈軒接羅倒戴菱荷畔談麈輕揮楊柳邊陌徹銅駝花爛漫堤連金谷草芊綿青春未老尚可出紅日已高猶自眠洞號長生宜有主窩名安樂豈無權敢於世上明開眼會向人間別看天盡送光陰歸酒盞都移造化入詩篇也知此片好田地消得堯夫筆似椽今宅契司馬溫公戶名園契富韓公戶名莊契王郎中戶名康節初不改也康節蓋曰貧家未嘗求於人

饋之雖少必受嘗謂伯溫曰名利不可兼也吾本求名
既為世所知矣何用利哉故甘貧樂道平生無不足之
意嗟夫洛陽風俗之厚人物之盛不可見矣重念老境
可傷因詳書之以示子孫云

康節先公謂本朝五事自唐虞而下所未有者一革命
之日市不易肆二克服天下在即位後三未嘗殺一
無罪四百年方四葉五百年無心腹患故觀盛化詩曰
紛紛五代亂離間一旦雲開復見天草木百年新雨露

車書萬里舊山川尋常巷陌猶簪紱取次園亭亦管絃
人老太平春未老鶯花無害日高眠又曰吾曹養拙賴
明時為幸居多寧不知天下英才中遁跡人間好景處
開眉生來只慣見豐稔老去未嘗經亂離五事歷將前
代舉帝堯而下固無之伯溫竊疑未嘗經亂離為太甚
先公曰吾老且死汝輩行自知之永念先公當本朝太
平盛時隱居求志謝聘不屈其發為詩章每如此

康節先公與富文忠公早相知文忠初入相謂門下士

田棐大卿曰為我問邵堯夫可出當以官職起之不即
命為先生處士以遂隱居之志田大卿為康節言康節
不答以詩二章謝之曰相招多謝不相遺將為胸中有
所施若進豈能禁吏意既閑安用更名為願同巢許稱
臣日甘老唐虞比屋時滿眼清賢在朝列病夫無以繫
安危又云欲遂終焉老閑計未知天意果如何幾重軒
冕酬身貴得此雲山到眼多好景未嘗無興詠壯心都
已入消磨鵷鴻自有江湖樂安用區區設網羅文忠公

終不相忘乃因明堂祫享赦詔天下舉遺逸公意謂河南府必以康節應詔時文潞公尹洛以兩府禮名見康節康節不屈遂以福建黃景應詔景字子蒙亦從康節遊客李邯鄲公家公之子壽朋薦於潞公時天下應詔者二十八人同見宰執於政事堂至河南黃景以閩音自通姓名文忠不樂各試論一首命官為試銜知縣文忠奏天下尚有遺材乞再令舉詔從之王拱辰尚書尹洛乃以康節應詔潁川薦常秩皆先除試將作監主簿

不理選限文忠招康節而不欲私故以天下為請知制誥王介甫不識康節繳還辭頭曰使邵某常民一試銜亦不可與果賢者不當止與試銜宜召試然後官之上不納下知制誥祖無擇除去不理選限行詞然康節與常秩皆不起是時富公已丁太夫人憂去位矣熙寧二年神宗初即位詔天下舉遺逸御史中丞三司副使吳充龍圖閣學士祖無擇皆薦康節時歐陽公作參知政事素重常秩故潁川亦再以秩應詔康節除祕書省校

書郎潁州團練推官辭不許既受命即引疾不起答鄉人二詩一曰平生不作皺眉事天下應無切齒人斷送落花安用雨裝添舊物豈須春幸逢堯舜為真主且放巢由作外臣六十病夫宜揣分監司何用苦開陳二曰却恐鄉人未甚知相知深後更何疑貧時與祿是可受老後得官難更為自有林泉安素志況無才業動丹墀荀揚若守吾儒分免被韓文議小疵常秩以職官起時王介甫方行新法天下紛然以為不便思得山林之士

相合常秩賜對神宗問曰仁宗召卿何故不起朕召何故起秩曰仁宗容臣不起陛下不容臣不起因盛言新法之便乃除諫官以至待制帝浸薄之介甫主之不忘然亦知其為人矣熙寧初介甫之弟安國字平甫為西京國子監教授從康節遊歸以出處語介甫介甫歎曰邵堯夫之賢不可及矣神宗正史康節列傳史臣書云與常秩同召某卒不起有以也夫

康節先公與富韓公有舊公自汝州得請歸洛養疾築

大第與康節天津隱居相邇公曰自此可時相招矣康
節曰某冬夏不出春秋時間過親舊間公相招未必來
不召或自至公謝客戒子曰先生來不以時見康節一
日過之公作詩云先生自衛客西畿樂道安閒絕世機
再命初筵終不起獨甘窮巷寂無依貫穿百代嘗探古
吟詠千篇亦造微珍重相知忽相訪醉和風雨夜深歸
康節和曰道堂閒話幾多時塵外盃觴不浪飛初上小
車人已識醉和風雨夜深歸又題康節擊壤詩集云黎

民於變是堯時便字堯夫德可知更覽新詩名擊壤先生全道略無遺其知康節如此公嘗令二青衣蒼頭掖之以行一日與康節會後園中因康節論天下事公喜甚不覺獨步下堂康節不為起徐指二蒼頭戲公曰忘却拄杖矣公深居託疾謝客而公嘗苦氣痞康節曰好事到手畏慎不為他人做了鬱鬱何益公笑曰此事未易言也蓋為嘉祐建儲耳雖剛勇遇事詳審不萬全不發康節因戲之公一日有憂色康節問公曰先生度其

之憂安在康節曰豈以王安石罷相呂惠卿參知政事
惠卿凶暴過安石乎公曰然康節曰公無憂安石惠卿
本以勢利合惠卿安石勢利相敵將自為仇矣不暇害
他人也未幾惠卿果叛安石凡可以害安石者無所不
至公謂康節曰先生識慮絕人遠矣一日薄暮司馬公
見康節曰明日僧顯修開堂說法富公呂晦叔欲偕往
聽之晦叔貪佛已不可勸富公果往於理未便其後進
不敢言先生曷止之康節曰恨聞之晚矣明日公果往

後康節因見公謂公曰聞上欲用裴晉公禮起公公笑
曰先生以謂某衰病能起否康節曰固也或人言上命
公公不起一僧開堂公乃出無乃不可乎公驚曰某
未之思也與康節食筭康節曰筍味甚美公曰未如中
堂骨頭之美也康節曰野人林下食筍三十年未嘗為
人所奪公今日可食中堂骨頭乎公笑而止康節疾病公
日遣其子偕醫者來饋藥物不絕康節捐館公賻贈之
甚厚伯溫除喪往拜公公惻然曰先生高嘗勸之學脩

養復曰不能學胡走亂走也問伯溫年幾何娶未伯溫對年二十四未娶公曰晚娶甚善可以保養血氣專意學問吾年二十八登科方娶嘗白先公先夫人未第決不娶弟妹當先嫁娶之故田氏妹先嫁元鈞也伯溫自此得出入公門下悲夫今海內之士嘗獲拜公林下唯伯溫一人想公英偉之姿凜然如在世也

熙寧三年司馬溫公與王荊公議新法不合不拜樞密副使乞守郡以端明殿學士知永興軍後數月神宗思

之曰使司馬在朝人主自然無過舉移許州令過闕上
殿公力辭乞判西京留司御史臺遂居洛買園於尊賢
坊以獨樂名之始與伯溫先君子康節游嘗曰光陝人
先生衛人今同居洛即鄉人也有如先生道學之尊當
以年德為貴官職不足道也公一日著深衣自崇德寺
書局散步洛水堤上因過康節天津之居謁曰程秀才
云既見溫公也問其故公笑曰司馬出程伯休父故曰
程留詩云拜罷歸來抵寺居解鞍縱馬罷傳呼紫衣金

帶盡脫去便是林間一野夫草軟波清沙路微手攜筇
杖著深衣白鷗不信忘機久見我猶穿柳岸飛康節和
曰冠蓋紛華塞九衢聲名相軋在前呼獨君都不將為
事始信人間有丈夫風背河聲近亦微斜陽淡泊隔雲
衣一雙白鷺來煙外將下沙頭卻背飛公一日登崇德
閣約康節久未至有詩曰淡日濃雲合復開碧伊清洛
遠縈迴林間高閣望已久花外小車猶未來康節和云
君家梁上年時燕過社今年尚未迴謂罰誤君凝竚久

萬花深處小車來又云天啓夫君八斗才野人中路必
須迴神仙一語難忘處花外小車猶未來康節有安樂
窩中詩云半記不記夢覺後似愁無愁情倦時擁衾側
卧未欲起簾外落花撩亂飛公愛之請書紙簾上字畫
奇古某家世寶之公與康節唱酬甚多具載擊壤集公
嘗問康節曰某何如人曰君實腳踏實地人也公深以
為知言至康節捐館公作挽詩二章其一曰慕德聞風
久論交傾蓋新何須半面舊不待一言親講道切磋直

忘懷笑語真重言蒙躋實佩服敢書紳記康節之言也
康節又曰君實九分人也其重之如此後公以康節之
故遇其孤伯溫甚厚公無子以族人之子康為嗣康字
公休其賢似公識者謂天故生之也公休與伯溫交游
益厚公薨公休免喪元祐間方欲大用亦不幸特贈諫
議大夫公休有子植方數歲公休素以屬伯溫至范純
夫內翰輩皆曰將以成溫公之後者非伯溫不可朝廷
知之伯溫自長子縣尉移西京國子監教授俾植得以

卒業因經紀司馬氏之家植字子立既長其賢如公休
天下謂真溫公門戶中人也亦蚤死無子溫公之世遂
絕

司馬溫公初居洛間於康節曰有尹材字處初張雲卿
字伯紀田述古字明之三人皆賢後處初明之得進於
溫公門下獨伯紀未見康節以問公公曰處初明之之
賢如先生言張君者或聞旅殯其父於和州久不省未
敢與見康節曰張雲卿可謂孝矣雲卿之父謫官死和

州貧不能歸因寓其喪雲卿奉其母歸洛貧甚府尹哀之俾為國子監說書得月俸七千以養若為和州一行則罷俸數月將飢其母矣其故如此溫公悵然曰某之聽誤矣伯紀自此亦從溫公游未幾伯紀之母死徒步至和州迎父柩合葬三君子既受知溫公公入相元祐處初明之以遺逸命伯紀以累舉特恩同除學官溫公好賢下士尊用康節之言如此伯紀學問該洽文潞公於經史注疏或有遺忘多從伯紀質之

康節先生與趙宗道學士游宗道年長康節拜之其諸
子皆以父師之禮事康節宗道早出富韓公門下熙寧
初宗道自西都留臺領宮祠以卒先是宗道季子濟為
提舉常平劾富公不行新法朝廷坐其言罷富公使相
宗道卒富公以致政居洛賻恤其家甚厚其兄弟服除欲
往謝富公濟獨未敢行請於康節康節曰以富公德度尚
何望於君第往勿疑諸兄行君不行是自處以不肖也明
日濟偕諸兄以進富公撫之甚恩濟不自安起謝罪公

止之曰吾見故人子前日公事不可論也濟謝康節曰
微先生濟之過不可贖也

熙寧癸丑春大名王荀龍字仲賢入洛見康節先公其
議論勁正有過人者康節喜之和其詩曰車從賞花來
北京耿君先期已馳情此時隕霜奈何重今歲開花徒
有聲既辱佳章當墜刺寧無累句代通名天之美才應
自惜料得不為時虛生仲賢魏公客也因出魏公送行
詩顏體大書極奇偉康節曰吾少日喜作大字李挺之

曰學書妨學道故嘗有詩云憶昔初學大字時學人飲
酒與吟詩若非益友推金石四十五歲成一非仲賢又
誦魏公詩云春去花叢胡蝶亂雨餘蔬圃桔槔閒康節
愛之曰怨而不傷婉而成章之言也仲賢之子名巖叟
字彥霖元祐初自知定州安喜縣召為監察御史有直
聲後位簽書樞密院彥霖父子皆魏公之客魏公定相
州薦彥霖為屬韓康公代魏公康公欲留彥霖彥霖謝
曰某魏公之客不願出他門也士君子稱之

康節先公嘗言李復圭龍圖臨事有斷年二十八知滑州與郡官夜會有衙兵奪銀匠鐵鎚殺人者一府皆驚擾公捕至立斬之上章待罪諸司亦按公擅殺仁宗曰李復圭帥才也除知慶州責光化軍有放停卒自陳乞添租剗佃某人官田者公曰汝揀停之兵如何能佃官田卒曰筋力未衰也公曰汝以衰故揀停既未衰卻合充軍呼刺字人刺元軍分人皆稱之公才高為衆所忌故仕官數不進公居多不平康節因和其詩作天吟一

篇曰一般顏色正蒼蒼今古人曾望斷腸日往月來無
少異陽舒陰慘不相妨迅雷震後山川裂甘露零時草
木香幽暗崑崖生鬼魅清平郊野見鸞鳳千秋爛為三
春雨萬木凋因一夜霜此意分明難理會直須賢者入
消詳蓋其意使有所感悟也

康節先生赴河南尹李君錫會投壺君錫末箭中耳君
錫曰偶爾中耳康節應聲曰幾乎敗壺坐客以為的對
可謂善謔矣

聞見錄卷十八

欽定四庫全書

聞見錄卷十九

宋 邵伯溫 撰

熙寧初王宣徽之子名正甫字茂直監西京糧料院一日約康節先公同吳處厚王平甫會飯康節辭以疾明日茂直來康節謂曰某之辭會有以姑聽之吳處厚者好議論平甫者介甫之弟介甫方執政行新法處厚每譏刺之平甫雖不甚主其兄若人面罵之則亦不堪矣此某所以辭會也茂直笑曰先生料事之審如此昨處

厚席間毀介甫平甫作色欲列其事於府某解之甚苦
乃已嗚呼康節以道德尊一代平居出處一飯食之間
其慎如此為子孫者當念之

熙寧中洛陽以道德為朝廷尊禮者大臣曰富韓公侍
從曰司馬溫公呂申公士大夫位卿監以清德早退者
十餘人好學樂善有行義者幾二十人康節先公隱居
謝聘皆相從忠厚之風聞於天下里中後生皆知畏廉
恥欲行一事必曰無為不善恐司馬端明知邵先生知

嗚呼盛哉

康節先公嘉祐中朝廷以遺逸命官辭之不從河南尹
遣官就第送告勅朝章康節服以謝即褐衣如初至熙
寧初再命官三辭又不從再朝章謝且曰吾不復仕矣
始為隱者之服烏帽緇褐見卿相不易也司馬溫公依
禮記作深衣冠簪幅巾縉帶每出朝服乘馬用皮匣貯
深衣隨其後入獨樂園則衣之常為康節曰先生可衣
此乎康節曰其為今人當服今時之衣溫公歎其言合

理

富公未第時家於水北上陽門外讀書於水南天宮寺
三學院院有行者名宗顥嘗給事公左右及公作相顥
已為僧用公奏賜紫方袍號寶月大師公致政築大第
於至德坊與天宮寺相邇公以病謝客宗顥來或不得
前則直入道堂見公曰相公頗憶院中讀書時否公每
為之笑時節送遺甚厚康節先公自共城遷洛未為人
所知也宗顥獨館焉可見宗顥非俗僧也康節登其院

嘗作洛陽懷古賦曰洛陽之為都也地居天地之中有
中天之王氣在焉予家此治平歲會秋乘雨霽與殿院
劉君玉登天宮寺三學閣洛之風景因得周覽惜其百
代興廢以乘天子雖都之而多不得其久居也故有懷
古之感以通諷誦諭君王好賦以賦言秋雨霽日色清
景方出秋益明何幽懷之能快唯高閣之可憑天之空
廓風之輕冷覽三川之形勝感千古之廢興乃眷西北
物華之妍雲情物態一氣茫然擁樓閣以高下煥金碧

之光鮮當地勢之拱處有王居之在焉惜乎天子居東都此邦若諸夏不會要於方來不號令於天下聲明文物不此而出道德仁義不此而化宮殿森列鞠而為茂草園囿基布荒而為平野鑾輿曾不到者三十餘年使人依然而歎曰虛有都之名也噫夏王之治水也四海之內列壤惟九而居中者實曰豫州荆河之北此為上流周公之卜宅也率土之濱進國為萬而居中者實曰洛陽瀍澗之側此唯舊都迄於今二千年之有餘因興

替之不定故靡常其厥居我所以作賦者閱古今變易之時述興亡異同之迹追既失之君王存後來之國家也噫大昊始法二帝成之三王全法參用適宜伊六聖之經理實萬世之宗師我乃謂治民之道於是乎大盡矣逮夫五霸抗軌七雄駕威漢之興乘秦之弊曹之擅幸漢之衰始鼎立而治終豆分而隳晉中原之失守宗江左之畫籤或走齊而驛魏或道陳而經隋自元魏廓河南之土植六朝之風物李唐蟠關中之腹孕五代之

亂離其間或道勝而得民或兵強而懾下或虎吞而龍噬或雞狂而犬詐或創業於艱難或守成於逸暇或覆餗而終焉或苞桑而振者故得陳其六事雖善惡不同其成敗一也其一曰大哉德之為大也能潤天下必先行之於身然後化之於人化也者效之也自人而效我者也所以不嚴而治不為而成不言而信不令而行順天下之性命育天下之生靈其帝者之所為乎其二曰至哉政之為大也能公天下必先行之於身然後教之

於人教也者正之也自我而正人者也所以有嚴而治
有為而成有言而信有令而行拔天下之疾苦遂天下
之生靈其王者之所為乎其三曰壯哉力之為大也能
致天下必先豐府庫峙倉箱銳鋒鏑峻金湯嚴法令於
烈火肅兵刑於秋霜竦民聽於上下惴夷心於外荒其
霸者之所為乎其四曰時若傷之於隨失之於寬始則
廢事久而生姦既利不能勝害故冗得以疾賢是必薄
其賦斂欲民不困而民愈困省其刑罰欲民不殘而民

愈殘蓋致之之道失其本矣其五曰時若任之以明專之以察始則烈烈終焉闕闕既上下以交虐乃恩信之見奪是以峻其刑罰欲民不犯而民愈犯厚其賦斂欲國不竭而國愈竭蓋致之之道失其末矣其六曰水旱為沴年歲耗虛此天地之常理雖聖人不能無蓋有備而無患貴儆戒於不虞不得中者加以寬猛失政重輕逸權不有水旱而民已困而況有水旱兵革者焉所謂本末交失不亡何待天下有成敗六焉此之謂也君天

下者得不用聖帝之典謨行明王之教化士可殺不可
辱民可近不可下上能撫如子焉下必戴其后也仲尼
所以陳革命則抑為人之匪君明遜國則杜為人之不
臣定禮樂而一天下之政教修春秋而罪諸侯之亂倫
刪詩以揚文武之美序書以尊堯舜之仁贊大易以都
括與六經而並存意者不可以地之重易民之教悖天
之時必時教之各備則居地而得宜是故知地不可固
有之也君上必欲上為帝事則請執天道焉中為王事

則請執人道焉下為霸事則請執地道焉三道之間能
舉其一千古之上猶反掌焉則是洛之興也又何計乎
都與不都也如欲用我吾從其中康節先生經世之學
蓋如此託賦以自見耳熙寧間宗顥尚無恙伯溫嘗就
其院讀書宗顥每以富公為學晚事相勉曰公夜枕圓
枕庶睡不能久欲有所思冬以冰雪夏以新水沃面其
勤苦如此康節先公懷古賦初無本唯宗顥能誦之年
幾九十乃死

康節先公先天之學伯溫不肖不敢稱贊平居於人事
機祥未嘗輒言治平間與客散步天津橋上聞杜鵑聲
慘然不樂客問其故則曰洛陽舊無杜鵑今始至有所
主客曰何也康節先公曰不二年上用南士為相多引
南人專務變更天下自此多事矣客曰聞杜鵑何以知
此康節先公曰天下將治地氣自北而南將亂自南而
北今南方地氣至矣禽鳥飛類得氣之先者也春秋書六
鷁退飛鵲鵲來巢氣使之也自此南方草木皆可移

南方疾病瘴癘之類北人皆苦之矣至熙寧初其言乃
驗異哉故康節先公嘗有詩曰流鶯啼處春猶在杜宇
來時春已非又曰幾家大第橫斜照一片殘春啼子規
其旨深矣伯溫後聞熙州有唐碑本朝未下時一日有
家雀數千集其上人惡之曰豈此地將為漢有耶因焚
之蓋敵中無此禽也已而果然因并記之以信先君之
說

康節先公於書無所不讀獨以六經為本蓋得聖人之

深意平生不為訓解之學嘗曰經意自明苦人不知耳
屋下蓋屋牀下安牀滋惑矣所謂陳言生活者也故有
詩曰陳言生活不須矜自是中才皆可了以老子為知
易之體以孟子為知易之用論文中子謂佛謂西方之
聖人不以為過於佛老之學口未嘗言知之而不言也
故有詩曰不佞禪伯不諛方士不出戶庭直際天地其
所著皇極經世書以元會運世之數推之千歲之日可
坐致也太極為堂奧乾坤為門戶包括六經陰陽剛

柔行乎其間消息盈虛相為盛衰皇王帝伯相為治亂
其肯為訓解之學也哉

熙寧三年四月朝廷初行新法所遣使者皆新進少年
遇事風生天下騷然州縣始不可為矣康節先公閑居
林下門生故舊仕宦四方者皆欲投劾而歸以書問康
節先公康節先公答曰正賢者所當盡力之時新法固
嚴能寬一分則民受一分之賜矣投劾而去何益嗚呼
康節先公深達世務不以沽激取虛名如此世所謂康

節先公為隱者非也

康節先公出行不擇日或告之以不利則不行蓋曰人未言則不知既言則有知而必行則鬼神敵也春秋祭祀約古今禮行之亦焚楮錢程伊川怪問之則曰明器之義也脫有一非豈孝子慈孫之心乎又曰吾高曾今時人以籩豆簋簠薦牲不可也伯溫謹遵遺訓而行之也

伯溫昔侍家庭請於康節先公曰大人至和中仁宗在

御富公當國可謂盛矣乃謝聘不起何也先公曰本朝至仁宗政化之美人材之盛朝廷之尊極矣前或未至後有不及也天之所命非偶然者吾雖出尚何益是非爾所知也伯溫再拜稽首不知所以問

康節先公遺訓曰汝固當為善亦須量力以為之若不量力雖善亦不當為也故有詩曰量力動時無悔吝隨宜樂處省營為若求騏驥方乘馬只恐終身無馬騎又嘗曰善人固可親未能知不可急合惡人固可疎未能

遠不可急去必招悔吝也故無吝君亭曰見善人未嘗
急合見不善人未嘗急去伯溫佩之終身不敢忘

康節先公言昔東京有一道人日飲酒於市醉後輒與
人曰今日當有某人來已而果然自此莫不然或問其
先知何術曰無心耳曰無心可學乎曰才欲使人學無
心即有心矣程伊川先生言昔貶涪州過漢江中流船
幾覆舉舟之人皆號泣伊川但正襟安坐心存誠敬已
而船及岸於同舟衆人中有老父問伊川曰當船危時

君正坐甚莊何以伊川曰心守誠敬耳老父曰心守誠敬固善不若無心伊川尚欲與之言因忽不見嗚呼人果無心險難在前猶平地也老子曰入水不濡入火不熱唯無心者能之

康節先公見一道人言嘗泛海遇舶風泊岸與數人下採薪有巨人數十長丈餘相呼之聲如禽獸盡捉以去用竿竹魚貫之食薦酒道人者偶在其竹末巨人醉睡走登船得脫因解衣出其所穿跡在脇下康節先公曰

四海之外何所不有但人耳目不能及耳

聞見錄卷十九

欽定四庫全書

聞見錄卷二十

宋 邵伯溫 撰

熙寧中有一道人無目以錢置手掌中即知正背年號人皆異之康節先公問曰以錢置爾之足亦能知之乎道人答曰此吾師之言也愧謝而去

伯溫少時因讀文中子至使諸葛武侯無死禮樂具有興乎因著論以謂武侯霸者之佐恐於禮樂未能興也康節先公見之怒曰汝如武侯猶不可妄論况萬萬相

遠乎以武侯之賢安知不能興禮樂也後生輒議先賢亦不韙矣伯溫自此於先達不敢妄論

伯溫上世范陽以中直篤實讀書謹禮為家法大父伊川丈人尤質直平生不妄笑語年七十有九以治平四年正月初一日捐館初無疾不食飲水者累日除夜康節先公以下侍立左右伯溫方七歲大父鍾愛之亦立其傍大父曰吾及新年往矣康節先公以下皆掩泣大父止之曰吾兒以布衣名動朝廷子孫皆力學孝謹吾

瞑目無憾何用哭大父平日喜用大杯飲酒謂康節先
公曰酌酒與汝別康節同叔父滿酌大杯以獻大父一
舉而盡再酌飲及半氣息微矣謂康節曰吾平生不害
物不妄言自度無罪即死以肉祭勿做佛事亂吾教無
令吾死婦人手汝兄弟候吾就小殮方令家之人哭勿
叫號俾我失路康節先公泣涕以從康節謀葬大父與
程正叔先生同卜地於伊川神陰原不盡用墓書大抵
以五音擇地以昭穆序墓陰陽拘忌之說皆所不信以

是年十月初三日葬開棺大父顏貌如生伯溫尚記之
熙寧十年夏康節先生感微疾氣日益耗神日益明笑謂
司馬溫公曰某欲觀化一巡如何溫公曰先生未應至
此康節先生曰死生常事耳張橫渠先生喜論命來問
疾因曰先生論命否當推之康節先公曰若天命則知
之世俗所謂命則不知也橫渠曰先生知天命矣某尚
何言程伊川曰先生至此他人無以為力願自主張康
節先公曰平生學道豈不知此然亦無可主張時康節

正寢諸公議後事於外有欲葬近洛城者康節先公已知呼伯溫入曰諸公欲以近城地葬我不可當從伊川先塋耳七月初四日大書詩一章曰生於太平世長於太平世死於太平世客問年幾何六十有七歲俯仰天地間浩然獨無愧以是夜五更捐館其治命如大父伯溫不敢違先是康節先公每展伊川大父墓中塗上官店必過孝傑殿丞家孝傑從康節先公最早孝傑死有八子康節先公遇之如子姪每過之則迎拜侍立左

右甚恭康節先公捐館之年寒食過之謂諸子曰吾再經此與今日異矣諸子不敢問至葬喪車及上官店諸子泣而言之以為異張景觀字臨之學行甚高康節先公喜之將赴涪州武龍尉告别康節先公泣數行下謂曰吾不見子之歸矣張岫字子堅康節先公於門弟子中謂可語道者赴調京師康節先公愀然色變曰吾老矣不復相見也皆是年之春也嗚呼康節先公所以預知者何止此哉伯溫不肖不能有所述也惟修身俟死

下從九原耳尚追憶其遺言以示子孫

康節先公與呂微仲丞相不相接先公與橫渠先生張子厚同以熙寧十年丁巳捐館今微仲文集中有和母同州丁巳吟云行高名並美命否數皆殂嗟爾百君子賢哉二丈夫毋方敦薄俗

卽堯夫樂道不仕

誰復距虛

無

張子厚論佛老之失

望道咸瞠若脩梁遽壞乎密章

燔漢綬環絰泣秦儒賴有諸良友能令紹不孤為先公與子厚作也蓋河南府以先公訃聞詔贈著作郎謚康

節子厚自祕閣病免西歸及長安以歿門人哀服挽車
葬橫渠云伯溫獲見公每語先公則悵然有不可及之
歎後伯溫初仕長子縣尉公入相元祐改西京國學教
授未久公罷政嗚呼亦所以為不孤之惠歟康節先公
居洛凡交游年長者拜之年等者與之為朋友年少者
以子弟待之未嘗少異於人故得人之歡心每歲春二
月出四月天漸熱即止八月出十一月天漸寒即止故
有詩云時有四不出

大風大雨大寒大暑

會有四不赴

公會葬會生會醪會

每出人皆倒屣迎致雖兒童奴隸

皆知尊奉每到一家子弟家人爭具酒饌問其所欲不復呼姓但名曰吾家先生至也雖閨門骨肉間事有未決者亦求教康節先公以至誠為之開論莫不悅服十餘家如康節先公所居安樂窩起屋以待其來謂之行窩故康節先公歿鄉人挽詩有云春風秋月嬉遊處冷落行窩十二家洛陽風俗之美如此康節先公過士友家晝枕見其枕屏畫小兒迷藏以詩題其上云遂令高

卧人欹枕看兒戲蓋熙寧間也陳恬云擊壤集不載

熙寧初歐陽文忠公為參知政事遣其子棐叔弼來洛省王宣徽夫人之疾將行語叔弼曰到洛唯可見邵先生為致吾嚮慕之意康節先生既見叔弼從容以語平生出處以及學術大槩臨別猶曰其無忘鄙野之人於異日後十年康節先公捐館又十年韓康公尹洛請謚於朝叔弼偶為太常博士次當謚議叔弼嘗謂晁說之以道云棐作邵先生謚議皆往昔親聞於先生者當時少

年一見忻然延接語以平生學術出處之大故得其詳
如此豈非先生學道絕世前知來物預以告耶蓋驗於
二十年之後異哉

康節先生少時游京師與國子監直講邵必不疑初敘
宗盟不疑年長康節先生以兄拜之蓋不疑自河朔遷
丹陽康節先公上世亦河朔人故也至康節自衛入洛
不疑為京西提刑嘉祐中河南府薦康節先公以遺逸不
疑自作薦章其詞有厚德足以鎮薄俗清風可以遺來

世相推重如此熙寧初不疑以龍圖閣學士知成都府
過洛謂康節先公曰某陛辭日再薦先生矣康節先公
追路洛北別去不疑中途寄康節先生詩云我乘孤傳
經崤澠君擁羣書卧洛城富貴人間亦何有閑忙趣味
甚分明不疑次金牛驛暴卒喪歸康節先公哭之慟女
嫁楊國寶應之應之亦康節先公門生康節先公視之
猶子也開禧元豐中為河南府推官康節已捐館伯溫
復以兄拜之宣和己丑伯溫赴果州道出閬州有知閬

中縣邵充美孺者相迎自稱同姓姪云伯溫以宗族源
流為問美孺曰充之上世自潤州入蜀龍閣公先人叔
父行也伯溫曰康節先公以兄事龍閣公伯溫不敢忘
自此與美孺之中外皆論親癸巳伯溫奉使西州美孺
居郾嘗至其家拜刑部公廟美孺資和易與人言如恐
傷之至臨吏政是非毅然不可奪君子人也丹陽河南
成都之邵其次第如此嗟夫世不講宗盟久矣具載之
以示三家子孫


伯溫之叔父諱睦後祖母楊氏夫人出也少康節先生
二十餘歲力學孝謹事康節如父熙寧元年四月八日
暴卒年三十三康節先公哭之慟既卒理其故書得叔
父所作重九詩云衣如當日白花似昔年黃擬問東籬
事寒香入杳茫及死殯後圃東籬下噫人之死生是果
前定矣

康節先公既捐館二程先生於伯溫有不孤之意所以
教載甚厚宗丞先生謂伯溫曰人之為學忌標準若循

循不已自有至矣先人敝廬廳後無門由傍舍委曲以出其不便之因鑿壁為門侍講先生見之曰前人規畫必有理不可改作某亟塞之侍講謂周全伯曰邵君雖小事亦相信勇於為善者也某初入仕侍講曰凡作官雖所部公吏有罪立按而後決或出於私怒比具按亦散不至倉卒傷人每決人有未經杖責者宜慎之恐其或有所立也伯溫終身行之

熙寧八年秋與士人十餘輩講學於洛陽建春門廣愛

寺端像院以待試一夕夢至殿庭唱第望殿上女主也
覺謂同舍皆不曉至元祐二年秋以經行薦明年唱名
集英殿宣仁太后垂簾聽政也方悟前夢驗於十五年
之後果有數矣



聞見錄卷二十